



CONVENIO DE COOPERACIÓN EDUCATIVA ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA DA XUNTA DE GALICIA E A ORGANIZACIÓN NACIONAL DE CEGOS ESPAÑOIS PARA O ESTABLECIMENTO DE MEDIDAS ENCAMIÑADAS Á ATENCIÓN DAS PERSOAS CON DISCAPACIDADE VISUAL

En Santiago de Compostela, a dezanove de agosto de dous mil trece

REUNIDOS

O Sr. **D. JESÚS VÁZQUEZ ABAD**, conselleiro de Cultura, Educación e Ordenación Universitaria da Xunta de Galicia, actuando en nome e representación deste departamento, de conformidade coas atribucións conferidas no artigo 34.1 da Lei do Parlamento de Galicia 1/1983, de 22 de febreiro, de normas reguladoras da Xunta e da súa presidencia, modificada pola Lei 11/1988, de 20 de outubro, e pola Lei 2/2007, de 28 de marzo, e no Decreto 4/2013, de 10 de xaneiro, polo que se establece a estrutura orgánica da Consellería de Cultura, Educación e Ordenación Universitaria, e

O Sr. **D. MANUEL MARTÍNEZ PAN**, delegado territorial da Organización Nacional de Cegos Españois (en diante, ONCE) en Galicia, nomeado mediante o Acordo 5 (E) 2011-2.3 do Consello Xeral da ONCE do 11 de maio, actuando en nome e representación desta última, en virtude da escritura pública de poder outorgada ante o notario de Madrid D. Antonio Crespo Monerri, con data 13 de maio de 2011, nº de protocolo 817,

EXPOÑEN

I

Que a Lei Orgánica 2/2006, de 3 de maio, de Educación, no seu título II, recoñece que as administracións educativas teñen a responsabilidade de procurar que todo o alumnado alcance o máximo desenvolvemento persoal, intelectual, social e emocional, e, para iso, deberán asegurar os recursos necesarios para que o alumnado que requira unha atención educativa diferente á ordinaria poida alcanzar o máximo desenvolvemento posible das súas capacidades.

II

Que a Lei 13/1982, de 7 de abril, de integración social dos minusválidos, establece os principios de sectorización dos servizos, integración e individualización que teñen que presidir as actuacións das administracións públicas, en todos os niveis e áreas, en relación coas persoas con algunha discapacidade. Así mesmo, a Lei 51/2003, de 2 de decembro, modificada pola Lei 26/2011, de 1 de agosto, de adaptación normativa á Convención Internacional sobre os Dereitos das Persoas con Discapacidade, establece que a igualdade de oportunidades supón a *ausencia de toda discriminación, directa ou indirecta, por*



motivo de ou sobre a base da discapacidade, así como a adopción de medidas de acción positiva orientadas a evitar ou compensar as desvantaxes dunha persoa con discapacidade para participar plenamente na vida política, económica, cultural e social.

III

Que o Decreto 229/2011, do 7 de decembro, polo que se regula a atención á diversidade do alumnado dos centros docentes da Comunidade Autónoma de Galicia nos que se imparten as ensinanzas establecidas na Lei orgánica 2/2006, de 3 de maio, de educación, dispón que o alumnado con necesidade específica de apoio educativo pode requirir apoios ou providións educativas diferentes ás ordinarias e que a consellería con competencias en materia de educación promoverá a colaboración entre as distintas administracións, entidades, asociacións e outras organizacións sen ánimo de lucro e con atribucións na prevención, detección temperá e intervención educativa co alumnado, establecendo protocolos comúns de actuación e favorecendo o intercambio de información e a difusión de boas prácticas.

IV

Que no Real Decreto 358/1991, de 15 de marzo, modificado polos Reais Decretos 1200/1999, de 9 de xullo; 1359/2005, de 18 de novembro; 394/2011, de 18 de marzo; 1146/2012, de 27 de agosto, e 3/2013, de 11 de xaneiro, polo que se reordena a Organización Nacional de Cegos Españois, así como nos seus Estatutos, quedan establecidos, entre os seus fins, a detección temperá de persoas con cegueira ou deficiencia visual grave, a atención educativa ás persoas afiliadas e a súa formación e capacitación profesional, así como a coordinación dos seus plans e programas cos obxectivos e criterios das administracións públicas.

V

Que as dúas institucións teñen a vontade de sumar os esforzos que se veñen realizando no campo da atención educativa ás persoas cegas ou con deficiencias visuais graves no ámbito da Comunidade Autónoma de Galicia, tratando de dar continuidade ao Convenio de cooperación asinado o 29 de decembro de 2008 e vixente ata o 31 de agosto de 2012.

En consecuencia, a Consellería de Cultura, Educación e Ordenación Universitaria e a ONCE acordan subscribir o presente convenio conforme ás seguintes

CLÁUSULAS

Primeira.- O presente convenio ten por obxecto establecer un marco de colaboración entre a Consellería de Cultura, Educación e Ordenación Universitaria e a Organización Nacional de Cegos Españois en Galicia, para a atención educativa do alumnado con cegueira ou deficiencia visual grave, así como das súas familias e dos centros educativos

aos que asistan, desde o momento da súa detección. A tal efecto, considerarase alumnado con cegueira ou con deficiencia visual grave aquel que presente un grao de visión igual ou inferior a 1/10, segundo a escala de Wecker, ou unha redución do campo visual igual ou inferior a 10 graos. Tamén terá esa consideración o alumnado escolarizado en calquera nivel educativo do que a necesidade de atención, derivada da súa baixa visión, conste no seu informe psicopedagóxico e se acredite polos equipos específicos creados ao amparo do presente convenio.

Segunda.- As institucións asinantes, asumindo o principio de inclusión establecido na lexislación vixente, adoptan o criterio xeral de que a escolarización do alumnado con cegueira ou deficiencia visual grave se efectúe nos centros educativos ordinarios, garantindo, mediante o presente convenio, os apoios pertinentes para que a escolarización e a inclusión se realicen de forma axeitada. Non obstante, cando as circunstancias o xustifiquen, poderá ditaminarse a escolarización transitoria nun centro específico da ONCE para a atención educativa de alumnado cego ou con deficiencia visual grave, con servizo de residencia, se é o caso. Esta escolarización efectuarase segundo a normativa interna da ONCE, garantíndose os apoios axeitados para que a escolarización e a integración se realicen de forma axeitada.

Terceira.- Os recursos humanos que cada entidade achega ao abeiro deste convenio, que figuran no anexo que o acompaña, conformarán os equipos específicos, cunha actuación encamiñada a complementar os servizos prestados con carácter xeral nos aspectos específicos da deficiencia visual e á atención específica do colectivo de persoas cegas ou deficientes visuais graves. Estes equipos estruturaranse como unidades funcionais formadas por profesionais de ambas institucións, dependendo, a nivel administrativo, cada un da institución correspondente, e a nivel funcional, da Comisión Mixta. Serán estes equipos os que, de ser o caso, trasladen á Consellería de Cultura, Educación e Ordenación Universitaria suxestións e orientacións para a elaboración de normativas, directrices e cantos documentos estean relacionados coa educación das persoas cegas ou deficientes visuais graves.

Cuarta.- As institucións asinantes comprométese a facilitar o acceso dos profesionais dos equipos específicos aos programas de formación ofertados por ambas institucións, certificando e homologando, no seu caso e de acordo coa lexislación vixente, as accións formativas que se leven a cabo ao amparo do presente convenio. Así mesmo, comprométese a promover a creación dun equipo de traballo, composto por persoal técnico de ambas institucións, que terá como misión a investigación e o desenvolvemento da accesibilidade das tecnoloxías da información e a comunicación no ámbito educativo de Galicia.

Quinta.- A Consellería de Cultura, Educación e Ordenación Universitaria asume as obrigas seguintes:



- a) Promover as medidas necesarias para que os centros educativos onde se escolarice alumnado cego ou deficiente visual grave faciliten, antes da finalización do curso escolar, a relación de libros de texto e demais materiais curriculares destinados ao alumnado obxecto do presente convenio, coa finalidade de proceder á súa adaptación (transcrición ao sistema Braille, gravación, etc.). No proceso de selección dos libros de texto e de materiais curriculares os centros educativos terán en conta o catálogo dos textos xa gravados ou transcritos ao sistema Braille, facilitado pola ONCE.
- b) Facer realidade o principio de inclusión establecido na lexislación vixente, escolarizando o alumnado con cegueira ou deficiencia visual grave nos centros educativos ordinarios.
- c) Velar que os medios e servizos que se teñen que utilizar na actividade escolar sexan accesibles na súa totalidade, garantindo que o desenvolvemento tecnolóxico non exclúa a ningunha alumna ou ningún alumno con discapacidade.
- d) Recoller as suxestións da ONCE para a elaboración de plans de formación para todos os profesionais que interveñen no proceso educativo do alumnado con cegueira ou deficiencia visual grave. Así mesmo, facilitar o acceso dos seus profesionais nos equipos específicos aos programas de formación ofertados pola ONCE.
- e) Facerse cargo dos salarios e dos gastos de desprazamento das mestras e dos mestres que achega ao presente Convenio, segundo se contempla no anexo deste.

Sexta.- A ONCE asume as obrigas seguintes:

- a) Realizar a dotación do material específico necesario para o acceso ao currículo do alumnado con cegueira ou deficiencia visual grave afiliado. Entre ese material considérase a adaptación do posto de estudo e a transcrición dos libros de texto e demais materiais curriculares destinados ao alumnado obxecto do presente convenio.
- b) Facilitar aos centros que escolarizan alumnado con cegueira ou deficiencia visual grave o catálogo dos textos xa gravados ou transcritos ao sistema Braille.
- c) Garantir a formación especializada na atención educativa ao alumnado con cegueira ou deficiencia visual grave dos profesionais dos equipos específicos que se crean ao abeiro deste convenio.
- d) Realizar a formación dos profesionais dos equipos específicos que interveñen no proceso educativo do alumnado con cegueira ou deficiencia visual grave. Igualmente, deseñar e realizar actividades formativas destinadas ás familias dese alumnado.
- e) Organizar cursos sobre signografías específicas, técnicas instrumentais básicas, tñlotecnoloxía, habilidades sociais, etc., favorecendo a asistencia a eles do alumnado cego ou deficiente visual grave, preferiblemente en períodos de vacacións e mediante o servizo de Escolarización Combinada/Compartida da ONCE.




f) Velar para que a actuación dos equipos específicos se dirixa a:

1. Apoiar o alumnado nas áreas de: atención temperá, desenvolvemento evolutivo infantil, Óptica e Oftalmoloxía, autonomía, estimulación visual, técnicas instrumentais básicas, competencia social, axuste á discapacidade visual, orientación educativa, intervención familiar, tecnoloxías da información e da comunicación, deporte e tempo libre, currículo escolar e colaboración cos servizos de orientación.
2. Transcribir, elaborar e adaptar o material.
3. Adaptar o posto de estudo.
4. Realizar propostas de adaptacións de acceso ao currículo para o alumnado cego ou deficiente visual grave.
5. Elaborar un plan de traballo para cada curso escolar e realizar a memoria dese plan.



g) Facilitar á Consellería de Cultura, Educación e Ordenación Universitaria aquela información ou datos necesarios para a elaboración de estatísticas, programas, etc.

h) Facerse cargo dos salarios e dos gastos de desprazamento dos recursos humanos que achega ao convenio, así como os correspondentes aos recursos materiais referidos no anexo deste.



Sétima.- Os medios económicos que a Consellería de Cultura, Educación e Ordenación Universitaria aporta para o curso escolar 2013-2014 representan un total de CENTO NOVENTA E DOUS MIL CINCOCENTOS CORENTA E TRES EUROS CON VINTE E CINCO CÉNTIMOS (192.543,25 €), correspondentes a salarios e a axudas de locomoción (desprazamento) das persoas que achega ao convenio. Dese importe, 182.923,83 € van con cargo á aplicación orzamentaria 09.60.422A.12 dos orzamentos xerais da Comunidade Autónoma de Galicia e 9.619,42 € van con cargo ao concepto 09.10.421A.231 dos orzamentos da Consellería de Cultura, Educación e Ordenación Universitaria xestionados a través das xefaturas territoriais.

Oitava.- Ambas partes comprométense a cumprir as obrigas que se derivan da Lei Orgánica 15/1999, de 13 de decembro, de Protección de Datos de Carácter Persoal, e demais normativa en vigor, no caso de que durante o desenvolvemento do presente convenio calquera das institucións asinantes teña acceso a datos de carácter persoal incluídos en ficheiros titularidade da outra, sen que o subministro deses datos persoais constitúa unha cesión ou comunicación de datos aos efectos de dito texto legal.



Novena.- Para o seguimento do presente convenio constituirase unha comisión mixta, formada por catro membros. Cada unha das partes designará dúas persoas, correspondendo a presidencia ao director xeral de Educación, Formación Profesional e



Innovación Educativa, ou persoa en quen delegue, e a secretaría, a un asesor ou asesora da Consellería de Cultura, Educación e Ordenación Universitaria.

A comisión reunirse, con carácter ordinario, dúas veces, unha ao comezo e outra ao remate do curso escolar, logo da convocatoria realizada pola presidencia da comisión. Con carácter extraordinario reunirse sempre que o solicite calquera das partes.

Correspóndenlle á comisión mixta as seguintes atribucións:

1. Promover e velar polo adecuado desenvolvemento deste convenio.
2. Realizar propostas aos equipos específicos para o plan de traballo de cada curso, no marco do presente convenio.
3. Informar a memoria anual dos equipos específicos, elaborando un informe anual sobre o funcionamento do convenio.
4. Informar calquera dúbida que se xere respecto deste convenio, sen prexuízo do establecido na lexislación correspondente.

Décima.- O presente convenio estará en vigor desde a súa sinatura ata o 31 de agosto de 2014, podendo prorrogarse, de ser o caso, mediante a correspondente adenda. Así mesmo, poderá denunciarse por calquera das partes, notificándoo cunha antelación de dous meses á outra parte.

Undécima.- O presente convenio ten carácter administrativo, polo que a súa interpretación, cumprimento e execución, en caso de discrepancias, corresponderá aos tribunais contencioso-administrativos, tralo esgotamento da vía administrativa.

Lido o presente convenio no lugar e data indicados no encabezamento, atópano conforme e asínano en proba do seu asentimento.

**POLA CONSELLERÍA DE CULTURA,
EDUCACIÓN E ORDENACIÓN
UNIVERSITARIA,**

O CONSELLEIRO,

Jesus Vázquez Abad

**POLA ORGANIZACIÓN NACIONAL DE
CEGOS ESPAÑOLS,**

O DELEGADO TERRITORIAL EN GALICIA,

Manuel Martínez Pan

ANEXO: ACHEGA DE RECURSOS

1. Por parte da ONCE:

a) Humanos:

- 14 mestras ou mestres: 8 na provincia de Pontevedra, 4 na da Coruña, 1 na de Ourense e 1 na de Lugo.
- 6/7 traballadoras ou traballadores sociais, 2/3 psicólogas ou psicólogos, 1 pedagoga ou pedagogo, 3/4 persoas técnicas de rehabilitación, 4 persoas instrutoras tiflotécnicas, 2 animadoras ou animadores socioculturais, 1 coordinadora ou coordinador deportivo, 2 especialistas en núcleos periféricos, 2 especialistas de emprego, 1 especialista de música e 1 mestra ou mestre destinado á investigación e formación, con intervención diversa.

b) Centros e servizos especializados:

- Centro de Recursos Educativos da ONCE en Pontevedra, cos seus servizos e ámbito de intervención nas comunidades autónomas de Galicia, Asturias e Cantabria:
 - o Servizo de escolarización combinada/compartida.
 - o Servizo de formación de profesionais.
 - o Servizo de investigación, elaboracións didácticas e adaptacións curriculares.
 - o Servizo de adaptación de recursos didácticos e tecnolóxicos.
 - o Servizo de desenvolvemento e adaptación no ámbito educativo das tecnoloxías da información e da comunicación.
 - o Servizo de residencia.

- Servizo bibliográfico da ONCE (SBO).

- Centro de investigación, desenvolvemento e aplicación tiflotécnica da ONCE (CIDAT).

c) Centros escolares da ONCE.

d) Recursos materiais:

- Adaptación do posto de estudo, segundo a normativa interna da ONCE.
- Libros Braille e sonoros.
- Material didáctico específico.

A ONCE poñerá a disposición das mestras e dos mestres de titularidade da Consellería de Cultura, Educación e Ordenación Universitaria un lugar de traballo



nos centros existentes nas cidades de adscrición, e dotaraos dos equipos informáticos, ferramentas e materiais específicos necesarios.

e) Recursos económicos:

- Os derivados dos custes dos recursos humanos, materiais e de servizos que aporta ao presente convenio.

2. Por parte da Consellería de Cultura, Educación e Ordenación Universitaria da Xunta de Galicia:

a) Humanos:

- A Consellería de Cultura, Educación e Ordenación Universitaria adscribirá 6 mestras ou mestres, de acordo coa seguinte repartición:
 - o 2 na provincia de A Coruña, na cidade de A Coruña.
 - o 1 na provincia de Lugo.
 - o 1 na provincia de Ourense.
 - o 2 na provincia de Pontevedra (1 na cidade de Pontevedra e 1 na de Vigo).
- Desde a sinatura do presente convenio ata a súa finalización mantense o profesorado anterior. Este profesorado será do corpo de mestres e terá como función apoiar, en réxime itinerante e nos ámbitos provinciais correspondentes, o alumnado con cegueira ou discapacidade visual escolarizado en educación primaria, primeiro e segundo de educación secundaria obrigatoria ou en centros ou unidades de educación especial.

b) Centros e servizos especializados:

- Rede de centros escolares.
- Centros de formación e recursos.
- Equipos de orientación específicos.

c) Recursos materiais:

- Os correspondentes á rede ordinaria de centros.

d) Recursos económicos:

- Os indicados na cláusula sétima do convenio.

